

江津縣志

天文志

星野

氣候

祥異

馬班作史以星野分屬州郡不言其所以然晉志  
衍之創爲某星入某郡幾度之說於是讀者或以  
方位不合爲疑以廣狹不均爲疑以天有歲差而  
分野卽當移易爲疑聚訟紛紛幾於莫衷一是然  
考之春秋商主大火參爲晉星周分烏帑楚則同  
之齊分元枵薛則同之梓慎曰宋大辰陳太皞鄭  
祝融皆火房也衛顛頊故爲帝邱其星大水由是  
推之一國各主一星又未嘗不歷歷可據稽諸史

江津縣志

卷一

天文志

一

籍宋武帝將受晉禪而長星竟天唐元宗將誅韋  
氏而天星散落如雪荆軻爲太子丹謀刺秦王而  
白虹貫日衛先生爲秦昭王畫長平之策而太白  
食昴人事動於下而天象變於上感應之理不信  
然歟

聖天子體元居正先天弗違後天奉若偶遇災變亦惟  
恐懼修省以迓天休而郎官出宰百里上應列星  
安得謂一邑之事不與乾象相符契耶作天文志

星野

史記天官書二十八舍主十二州蓋有分民卽有分土有分土卽有分星歷史咸宗之左思蜀都賦岷山之精上爲井絡華陽國志其分野輿鬼東井

南方朱鳥七宿井居其首八星如井橫列河中參旁之東有玉井故曰東井亦曰天井水星也主水泉南方七宿之次曰輿鬼在井東四星一曰天廟又曰天松天匱天壙土星也其中爲日月五星中道又爲朱雀頭眼主視明察奸謀天之目也

論井鬼星

按星野之說言蜀分者隋以前主觜參隋以後主井鬼而

大清一統志謂成都重慶俱屬井鬼分野鶉首之次大約天文家言人人殊未可以臆斷也然考漢書巴蜀分井鬼參常璩蜀志精靈則井絡垂耀河圖括地象曰星應輿鬼故君子精敏小人鬼黠與秦同分故多悍勇唐書劍南道分井鬼宋史東井輿鬼鶉首也盡巴蜀漢中之地明史川省分野井九度至柳三度鶉首之次合觀諸書則蜀省分野其屬井鬼明矣至入參之說攷周禮保章氏以星土

辨九州註云觜參主益州春秋元命苞云觜參流爲益州史記天官書謂益州爲參分又載東井輿鬼分屬雍州秦地也蜀志所云星應輿鬼與秦同分此井鬼入參之所本也省志載成都屬入參一度重慶屬入參三度凡星經在天一度統地二千三百九十二里而黃鼎度里通議又謂每度約二百五十里夫縣無專宿祇附於郡津邑距重慶尙在二百里內則言江津分野當以井鬼之次入參三度爲斷

氣候

江津縣志

卷一

氣候

三

考工言天有時地有氣百里殊候十里異宜津邑地少雪多暖桃李臘盡春初華牡丹仲春初旬卽放梅二月實稻仲春播種六月熟早者五月亦熟七八月則盡登場其他荏菽麻麥等類皆較他處先成總由氣候多煖故也自乾隆戊戌大旱以後土田墾闢殆盡林木稀少陽氣舒泄嚴冬亦不甚冷春初早煖夏熱尤甚五穀蔬菜之類較早於前祥異

明憲宗成化二十年江津虎患縣令黃昭禱於神患遂息

武宗正德十五年江津水溢舟入津署官民露處  
石子山三日乃消

世宗嘉靖十九年縣民韓愷家牛生二犢

國朝順治三年大疫旋有虎患時當流賊殘殺之後  
幾無遺民

雍正五年縣西鎮門城內有唐開元時所植荔枝  
樹忽枯死九年復活枝葉茂盛不減於前

乾隆丙午年五月初六日地震六月大水

嘉慶八年三月縣屬碑漕山中大雨雹二十里內  
居民屋宇半傾多壓斃者物類亦傷殘不少十二

月初四日昧爽大雷電

九年三月二十三日夜大雨雹風甚城內外屋瓦  
俱損居民有擊斃者石坊倒折數座

同治庚午年五月十九日大水入城僅有板橋街  
人可往來其水直達泮池附城民房倒塌數百家  
三日乃退

道光庚子年筭里龍洞場五月水災街市盡沒同  
治甲戌五月復被水淹較前尤高數丈兩次俱經  
縣主看驗賑濟

道光二十六年四月初八日熱甚至晚雨雹大者

如卵風亦異常竹樹當道半皆傾倒摧折  
同治元年四月有白蝶無數飛過北岸無一向南  
者間着樹如雪點然數日乃止後應石逆擾亂  
同治七年菱塘側舊奎閣有大蛇見是歲獲鄉薦  
者十人